



Komunikadu Imprensa

15 Janeiru 2013

Governu propoin billaun \$1.9 iha Orsamentu Jerál Estadu 2013 - utilizasaun fundu minarai la ekilíbriu

Iha 18 Dezembru 2012 Governu propoin billaun \$1.9 iha planu Orsamentu Jerál Estadu 2013 ba Parlamentu Nasionál. Tuir planu orsamentu ne'e governu sei utiliza ba:

- Saláriu Estadu no vensimentu millaun \$160.3
- Fundu infrastrutura millaun \$752.9
- Bens no servisu millaun \$419.3
- Transferénsias públika millaun \$236.5,
- Kapitál ki'ik millaun \$47.2
- Kapitál no dezvoltimentu millaun \$139
- Fundu dezvoltimentu kapitál umanu millaun \$42.4

Parseiru dezvoltimentu sira sei fó millaun \$200.4 hanesan doasaun ba Timor-Leste iha 2013. Doasaun ne'e representa 10% totál orsamentu Estadu nian. Restu fundus sei mai husi reseitas domestika (millaun \$1.7), fundus imprestimu (millaun \$43.6) no osan husi tinan kotuk (millaun \$409.8).

Restu billaun \$1.2 sei foti hotu husi fundu minarai. Osan ida ne'e representa 63% totál orsamentu Estadu nian. Ida ne'e maka boot liu Estimasaun Rendementu Sustentavel 2013 ne'ebé lolos autoriza deit atu foti milaun \$787.

“Ami lamenta tebe-tebes ba utilizasaun fundu minarai ne'ebé la ekuilíbriu tanba kada tinan governu kontinua hato'o pedidu montante boot atu foti fundu minarai liu 3%, tuir Estimasaun Rendementu Sustentavel Lei Fundu Minarai, maibe utilizasaun fundu ne'e kontinua la fó rezultadu significante ba povu nia moris,” dehan Luis de Oliveira Sampaio Diretór Ezekutivu JSMP.

“Situasaun ne'e hatudu katak laiha polítika ne'ebé fó garantia ba planu ne'ebé sustenavel.”

JSMP preokupa katak Estadu la iha planu atu garantia fundus alternativu ba futuru atu rezerva ba futura bainhira fundus minarai hotu. Ezemplu, iha tinan ne'e, governu aloka deit millaun \$3 hodi fornese fini ba iha setór agrikultura.

Tuir estimasaun Estadu nian, iha tinan 2013 nia rohan, Estadu sei hetan deit millaun \$146.3 nu'udar reseitas doméstika. Ne'e hatudu Estadu depende ba fundu minarai deit no laiha polítika atu hasae reseitas doméstika.

Parlamentu rasik tantu husi bloku maioria parlamentar nomós Fretilín kestiona maka'as governu ba rezultadu ezelesaun orsamentu durante período governasaun AMP ne'ebé la hatan ba nesesidade báziku povu nian ba iha tempu hirak mai.

“JSMP konsidera situasaun hirak ne'e akontese tanba governu la konsege identifika polítika ne'ebé responde ba povu nia kondisaun no la iha polítika ne'ebé balansu, aliende ho rekursu umanu ne'ebé limitadu,” tenik Luis de Oliveira Sampaio Diretór Ezekutivu JSMP.

Atu hetan informasaun kle'an liu tan favor kontaktu:

Luis de Oliveira Sampaio
Diretór Ezekutivu JSMP
info@jsmp.minihub.org
Telefone: 3323883 | 77295795
www.jsmp.tl